

## Xitre Pawre kot Xitre hwȳr kagà nẽ mẽnh

Pawre na pre kagàja nh̄ipêx. Kêp Jejus nh̄y hã hkrajé jahkre ho pa xwýnhjé hõ na pre. Nh̄um pre Xitre Pawre hköt pa hã mytwrì xohtô nẽ. Tã kêp Jejus kôt hkwýjé nhõ pastô kaxyw gô hipôk pê Kret ã arïk nẽ Tirtûm kapêr o mẽ ahkre ho mẽ hköt pa. Jakamã nh̄um Pawre kãm kagàja nh̄ipêx nẽ kamã kãm mẽmoj tã karõ. Tirtûm kapêr o mẽ hêx xwýnhjaja tanhmã kot ja nê mẽ hkurê to hã kãm karõ. Nẽ mẽ kot Tirtûm kapêr o mẽ ahkre mex pix xwýnhjaja Jejus kwýjé kaxyw kot mẽ rênh ã kãm karõ. Nẽ Jejus kwýjaja kot axpën to mex o pa hã kot mẽ kãm karõ kaxyw kagàja kamã mẽ kaxyw kãm hã kagà. ã na pre Pawre Xitre mã mẽmoj tã karõ nẽ hã kagà nẽ hwȳr mẽnh anẽ. Nẽ kãm:

<sup>1</sup> Pa Xitre? Xà amex? Ixpê Pawre na pa awȳr kagà nh̄ipêx nẽ kumẽ. Na pa hte Tirtûm mã tanhmã amnhï nh̄ipêx to ho ixpa. Nẽ ixpê Jejus Kris nh̄y hã hkrajé jahkre o ixpa xwýnh jakamã na pa hte mẽ kot amnhï kaxyw hköt hamaxpêr týx kaxyw tanhmã mẽ kãm ixkapêr to ho ri ixpa. Nẽ mẽ kot hprï hã mar kaxyw Tirtûm kapêr o mẽ ahkre mex nẽ. <sup>2</sup> Mẽ kot inhmar nẽ nh̄ymã htyk nẽ ma Tirtûm mẽ Jejus wa hwȳr àpir nẽ wa kuri htîr tûm nẽ pa ho pa hã amnhï kukamã hamaxpêr kaxyw. Amnepêm na pre Tirtûm ã mẽ pahpê hkrajé hkukamã mẽ pajarênh anẽ. Nẽ ãm hãmri ã

mē pajarēnh anē. Na hte mēmoj tā amnhī to hēx kêt nē.<sup>3</sup> Tā ra mē pakukamā mē pamā mēmoj to amnhīrīt nē inhmā kapēr o:

—E Pawre kēr ka ma mē hpiitā mē hkôt ri apa nē mē kām ixkapēr jarē nē mē kām: “Kot kaj mē amnhī kaxyw Tīrtūm Kra hkôt ajamaxpēr nē hkôt amnhī xunhwȳ nhūm Tīrtūm ja hā mē apumu nē mē ato hkra. Ka mē nhȳrmā atyk tā nhūm amnhī wȳr mē ato api ka mē wa kuri amex kumrēx nē atīr tūm nē apa ho apa.” Anhȳr o mē kām ixkapēr jarēnh o ri mē hkôt apa Pawre.

<sup>4</sup> Anhȳr o inhmā kapēr tā pa ã amā ixkapēr nē hā kagà anē Xitre. Pajamē pahte amnhī kaxyw Jejus kôt pajamaxpēr nē hkôt amnhī xām jakamā te apē ixkra pyràk. Jakamā na pa hte ato Mēpanhīpêêxà maati Tīrtūm mē mē papytàr xwȳnh Jejus Krisja wa hwȳr rāhā ho ri ixpa nē wa kām:

—Pa Tīrtūm mē Pahihti wa. Nà Xitre ho na pa wa awȳ. Kwa kēr ka wa kutā anojarêt rāhā ho ri apa. Kē wa akukwak ri hamakētkati nē àmnhīx pa ho pa. Anē.

*Kris kwȳ hkrāhtūmjaja kot tanhmā amnhī nhīpēx  
to kaxyw mē hā kām karō*

*Wam Ximotre 3.1-13*

<sup>5</sup> Nē na pa pre Kret rūm inhnojarêt hāmri nē amā axàpēnh ã karō nē Kret kām are nē man mō. Na pa pre amā:

—E kēr ka jar arīk nē mē kām ixkapēr jarēnh jatur xàm mēnh o mē hkôt apa. Nē Kris kôt pahkwȳjē mā mē hkrāhtūmjē xunhwȳ. Kret kām krī piitā hkôt. Na pa pre ixprī hā tanhmā amā mē harēnh to. Tā kēr ka ate inhmār xà hkôt mē hkwȳjē

kapi nē mē unhwȳ. Koja mē ã amnhī nhīpēx anhȳr o pa ka ja hā mē omu nē mē unhwȳ.

<sup>6</sup> Koja mē tām amnhī nhīpēx o pa nhūm mē piitā axpēn mā mē mex ã mē harē.

Nē mē hprō pix tānopxar o pa nē kuhpa hā nhām mēnijē ho amnhīkati hkēt nē.

Nē kē mē hkrajaja hipēêxà pyrà nē amnhī kaxyw Jejus kôt hamaxpēr o pa. Jao hipēêxà nē katorxà wa kapēr ma nē wa hkôt amnhī nhīpēx. No ri htȳx ri amnhī tomnuj o pa hkēt nē.

Anhȳr o na pa pre mē hā amā karō. <sup>7</sup> Jejus kôt pahkwȳjē hkrāhtūmjaja kot Tīrtūm nhȳ hā hkrajē mā kapēr mex o pa jakamā na htem tām amnhī nhīpēx o pa.

Nē amnhī pix kukamā hamaxpēr o pa hkēt nē.

Nē gryk tokyx anhȳr kēt nē.

Nē kagôxȳhti japrōr nē ho pipānh o pa hkēt nē.

Nē oprē ho pa hkēt nē.

Nē kàxpore rūnh prām xàj hēx rom tanhmā amnhī nhīpēx to hkēt nē.

Na htem ã amnhī nhīpēx anhȳr hkēt nē.

<sup>8</sup> Ām àmnhīx amnhī nhōrkwȳ hwȳr mē hwȳr o pa.

Nē mē piitā mē kutā nojarēt rāhā nē.

Nē tām hamaxpēr nē tām mē piitā mē hipēx o pa.

Nē amnhī tomnuj pymaj amnhī to htȳx pē Tīrtūm kôt amnhī nhīpēx mex rāhā ho pa.

<sup>9</sup> Nē mē kot Tīrtūm kapēr mar tȳx jakamā kē mē arī hā nohtȳx nē mar tȳx xà hkôt amnhī xō ri ho hkwȳjē jahkre mex o pa.

Nē ho mē piitā mē hamaxpēr o hihtȳx o pa.

Nhūm mēhō Tīrtūm kapēr kwȳm ri tanhmā ujarēnh to nhūm hā kuma nē hprī hā kām

tanhmā harēnh to kē mar mex nē.  
 E Xitre. Na hte ã Jejus kwŷjê hkrähtūmjaja amnhī nhîpêx anhŷr o pa. Jakamā kēr ka aprī hā Kret kām Jejus kôt pahkwŷjê kapi nē mē kot tanhmā amnhī nhîpêx to ho pa hā mē omu. Nhūm mēhō ã amnhī nhîpêx anē ka ja hā omu hāmri nē kēp Jejus kwŷjê hkrähtūm kaxyw ãm.

*Kret nhō xwŷnhjaja kot tanhmā amnhī totnuj to hā mē harēnh*

*Xitre 3.9-11*

<sup>10</sup> Nē atar Kret kām na hte mē ohtô nē kām mē ō pahi kapēr mar prām kêt nē htŷx ri tanhmā Kris kwŷjê mā kapēr to ho pa. Na hte Ijaew kwŷjaja ã amnhī nhîpêx anhŷr o pa. Jao Ijaew kêt xwŷnh kot Jejus kôt amnhī xunhwŷr xwŷnhjê mā kām:

—Kwa mē ixpyrà nē mē ixpê Ijaewjê kot amnhī nhîpêx kôt mān amnhī nhîpêx kêt wehe.

<sup>11</sup> Anhŷr o mē kām kapēr jakamā kwa kēr ka ã mē kapēr anhŷrja nē mē kām akapēr kām axihtŷx nē. Na htem hpijaàm kêt o hikàxpore hprām xàj ã mē kām kapēr anhŷr o pa. Jao mē hamaxpēr o ahkà nhūm mē kuma nē tee ri hamaxpēr. <sup>12</sup> Na pre ra mē hkwŷjê hō tanhmā mē harēnh to. Mē ahkre xwŷnhjê hōja mē harēnh o:

—Kret nhō xwŷnhjaja na htem hêx pix o pa. Nē oprê nē kām kaga nē apkur xà pix kukamā hamaxpēr o pa. Anē.

<sup>13</sup> ãm hāmri ã mē harēnh kot anhŷr. Ñ mē kot amnhī nhîpêx anhŷr jakamā kwa mē kot amnhī nhîpêxja nē mē kām akapēr kām axihtŷx o ri mē hköt apa Xitre. Kê mē ã amnhī nhîpêx anhŷr kêt nē. Nē mē kām anē kē mē amnhī kaxyw Tîrtūm kôt

mān hamaxpēr tÿx nē. <sup>14</sup> Nē kē mē axte Ijaewjê xu-jarēnh nē mē kot amnhī nhîpêx kôt amnhī nhîpêx kêt nē. Å mē kot amnhī nhîpêx o pa hā mē kām karō xwÿnhjaja na prem Tîrtûm kapēr kaga hpa. <sup>15</sup> Mē kot Jejus kôt amnhī xunhwÿr xwÿnhjaja tām mē hamaxpēr o pa jakamā na htem Tîrtûm kot mêmoj piitâ ho kator xwÿnh pumu nē piitâ mex å harë. No mē kêp Jejus kwÿ hkêt xwÿnhjaja na htem hamaxpēr punuj pix o pa. Nē mêmoj mex pumu nē mex kêt å harë. Mex tā nhûm mex kêt å harênh o pa. <sup>16</sup> Nē mē kêp Tîrtûm kra hâ amnhî jarênh tâ amnhî tomnuj pix o pa. Jao kêp hkra hâ amnhî jarênh o hêx nê kapêr kwÿm ri amnhî nhîpêx pix o pa. Nhûm Tîrtûm tee ri ja hâ mē omu nê kâm mē hkînh kêt nē. Tîrtûm mâ mē kot amnhî to mex kwÿ mē hâ jêt kêt kumrëx.

## 2

<sup>1</sup> E Xitre kot paj tanhmâ ate mē ahkre hto hâ amâ karô ka inhma nê amnhî xô ri mē kâm hâ karô ho ri apa.

*Mêmey wejjaja kot tanhmâ amnhî nhîpêx to kaxyw mē hâ kâm karô*

<sup>2</sup> Nê kér ka mêmey wejjê mâ anê kê mē amnhî to àptâr mex nê pa.

Nê pipânh nê ri pa hkêt nê.

Nê mē gryk kaxyw htÿx ri hkwÿjê hâ hpêr o pikênh kêt nê.

Kê mē tâm hamaxpēr nê tâm amnhî nhîpêx o pa.

Nê amnhî kaxyw Jejus kôt hamaxpēr tÿx râhâ nê.

Nhūm mē hkwȰjaja kot mēmoj tā tanhmā mē homnuj to htā kē mē arī tām amnhī nhīpêx o pa nē amnhī tā tanhmā mē ho hkêt nē.  
E kēr ka ã mēmy wejjē mā ja hā akarō anē.

*Mēni wejjaja kot tanhmā amnhī nhīpêx to kaxyw  
mē hā kām karō*

*Wam Korīt 14.34-35; Wam Ximotre 2.9-15, 3.11;  
Wam Pêtre 3.1-6*

<sup>3-4</sup> Nē mēni wejjē mā anē kē mē kām Jejus kīnh xàj tām ri amnhī nhīpêx o pa.

Jao axpēn jakwa kamā nhām mē hixi ho rēr o pa hkêt nē.

Nē kagôxȰhti ho pipānh o pa hkêt nē.

Nē mē kām anē kē mēni xàptâr nywjê jahkre mex o pa. Mē kot mē mar nē mē urâk nē tām amnhī nhīpêx kaxyw. Jao mē kām mē mjēn nē mē hkrajê japê hā mē kām mēmoj to anhȰr o mē kutā nojarêt rāhā ho pa.

Kēr ka ã mēni wejjē mā akapēr anē.

*Mēni xàptâr nywjaja kot tanhmā amnhī nhīpêx to  
kaxyw mē hā kām karō*

<sup>5</sup> Nē mēni xàptâr nywjê mā anē kē mē tām hamaxpēr pē tām amnhī nhīpêx o pa.

Nē mē òrkwȰ kamā àpênh mex o pa.

Nē mē mjēn kapēr ma nē hkôt amnhī nhīpêx.

E. Æ mēni xàptâr nywjê mā karō anē. Koja mē ã amnhī nhīpêx anhȰr o pa hāmri nhūm mē piitā mē kot amnhī nhīpêx ã mē omu nē mē harēnh o:

—Tīrtūm kapērja mex kumrēx. Mē kot hkôt amnhī nhīpêx o mē pa xwȰyñhaja na htem tām amnhī nhīpêx mex o pa. Anē.

*Mẽmy xàptàr nywjaja kot tanhmã amnhĩ nhípêx  
to kaxyw mẽ hã kãm karõ*

*Wam Ximotre 4.12; Sikũn Ximotre 2.22; Wam Pêtre 5.5*

**6** Nẽ kér ka mẽmy xàptàr nywjé mã anẽ kê mẽ mẽmoj punuj pê amnhĩ to htìx o pa. Mẽ hamaxpêr punuj nẽ mẽ kot tanhmã amnhĩ tomnuj to pê amnhĩ to htìx o pa.

**7** Nẽ kér ka ajaxwýja tãm amnhĩ nhípêx rãhã ho ri mẽ hkôt apa Xitre. Mẽ kot ja hã apumunh nẽ akôt amnhĩ nhípêx o pa kaxyw. Nom kér ka tanhmã mẽ ahkre hto hkwým ri tanhmã amnhĩ nhípêx to hkêt nẽ. ãm Tirtum ã apijaàm o akatât kôt mẽ kãm kapêr o mẽ ahkre pê tãm amnhĩ nhípêx o ri apa.

**8** Nẽ kér ka tãm akapêr rãhã ho ri apa. Kér kê mẽ kãm mẽ pahkurê xwýnhjaja ja hã ama nẽ amnhĩ kamã hpijaàm hãmri nẽ apê Kris kwì hã tanhmã ato kapêr punuj to hkêt japêr.

*Mẽ kãm mẽ àpênh xwýnhjaja kot tanhmã amnhĩ  
nhípêx to kaxyw mẽ hã kãm karõ*

*Epes 6.5-8; Korosë 3.22-25; Wam Ximotre 6.1-2;  
Wam Pêtre 2.18-25*

**9** Nẽ kér ka mẽ kãm mẽ àpênh o mẽ pa xwýnhjé mã anẽ kê mẽ õ paträw kãm hpräm xà hkôt amnhĩ nhípêx o pa.

Jao mẽ kapêr ma nẽ hkôt amnhĩ nhípêx mex nẽ.  
Nẽ amnhĩ tã tanhmã mẽ kãm kapêr punuj to hkêt nẽ.

**10** Nẽ kê mẽ kêp mẽmoj to àhkñh kêt nẽ.

Nẽ tãm mẽ hipêx rãhã nẽ.

Nẽ kãm hkukrêx jamãr mex o pa.

Koja mē ã amnhī nhīpêx anhŷr o pa nhūm mē õ patrāw amnhī tā mē omu nē mē ÿ hā hkīnh nē pa. Hāmri nē hamaxpēr o:

—Hêxta waa nē. Inhmā àpênh xwŷnhta na hte inhmā àpênh mex o pa. Na hte ixkukrêx nē ixkrit jamâr mex nē ixpê mêmoj to àhkînh kêt nē. Nà mē kot Tîrtûm kapêr kôt amnhī nhīpêx o mē pa xwŷnhjaja na htem tâm amnhī nhīpêx o pa. Pêr Tîrtûm kapêr ãm hāmri na. Æm mex o mex. Anë.

E Xitre kêr ka mē kâm mē àpênh xwŷnhjê mā ã mē kot amnhī nhīpêx anhŷr ã karõ.

*Tanhmā Jejus kâm mē pajapê xâj amnhī nhīpêx to hā harênh*

*Epes 2.8-10; Wam Tesarõn 1.9-10*

<sup>11</sup> Nê Tîrtûm kot mêmoj to mē pakutâ nojarêt râhâ ho pa jakamâ na hte mē pahte Kra hkôt amnhî xunhwŷr xwŷnhjê ho hkra pu mē nhýrmâ wa kuri pahtîr tûm nê papa ho papa. <sup>12</sup> Na hte ã mē pamâ kapêr o amnhîrît anë nê mē pamâ:

—E kêr ka mē apê ixkra hâ tâm amnhî nhîpêx râhâ ho ri apa nê axte tanhmâ amnhî tomnuj to nê tanhmâ ajamaxpêr punuj to hkêt nê. Mê ate amnhî tomnuj pê amnhî to htŷx nê ixkapêr kôt pix mâ ri amnhî nhîpêx râhâ nê. Anë.

<sup>13</sup> Na pu htem ã amnhî nhîpêx anhŷr o papa jao pahkînh nê mē papytar xwŷnh Jejus Kris jamâr o papa. Koja nhýrmâ mē panhô Tîrtûm xihtyâ xwŷnhja akupÿn mē pahwŷr kumê pu mē mex o mex ã omu.

<sup>14</sup> Na pre Jejus amnhî grônh kôt mē pahwŷr wrŷ nê mē pahtiitâ mē pahte amnhî tomnuj pânha amnhîrer kaxyw htyk o Tîrtûm mâ amnhîrer pa.

Mēmo kaxyw na pre ã mē panê amnhī nhīpêx anē? Nà mē pahpê hkwŷja na kām hprām. Nē mē pahte tām ri Tīrtūm kapēr kôt amnhī nhīpêx o papaja na kām hprām. Nē mē pahte uràk nē mē piitā mē kutā panojarêt rāhā ho papaja na kām hprām. Jakamā na pre ã mē panê amnhī nhīpêx anē.

<sup>15</sup> E Xitre. Ixte mēmoj tā amā karōja kēr ka ho Kris kwŷjê jahkre mex o apa kē mē ama nē kapēr kôt amnhī nhīpêx o pa. Nhūm mēhō tanhmā amnhī tomnuj to ka hā omu nē Tīrtūm nhŷ hā tanhmā nē kām akapēr to kē axte hkêt nē. Tā mān ka inhma. Kēr ka ã Kris kwŷjê jahkre mex o apa anē.

### 3

*Tanhmā Kris kwŷ kot amnhī nhīpêx to hā mē kām karō*

*Rōmān 13.1-10; Epes 2.1-10*

<sup>1</sup> Nē kēr ka Kris kôt akwŷjê mā anē kē mē ho amnhīptär xwŷnhjê kapēr ma nē mē hkôt amnhī nhīpêx o pa. Nē mēmoj to mē kutā nojarêt rāhā ho pa.

<sup>2</sup> Nē mē kām anē kē mē tanhmā hkwŷjê mā kapēr punuj to ho pa hkêt nē. Rŷ mēmoj tā mē kām àkjēr kêt nē. Kē mē tām mē hipêx nē mē kamā ukaprī pê mē ho mex rāhā ho pa. Na hte ã Kris kwŷjaja axpēn nhīpêx o pa anē. <sup>3</sup> Kormā mē pahte hkôt amnhī xunhwŷr kêt ri na pu prem ã amnhī nhīpêx anhŷr kêt nē. Na pu prem Tīrtūm mā pajamaxpēr kêt nē kapēr kôt ri amnhī nhīpêx hkêt nē. Nē amnhī tomnuj pix kukamā pajamaxpēr o ri papa. Nē amnhī pix kukamā pajamaxpēr. Jao mē pamā pam amnhī nhīpêx prām xà kôt pix mā

tanhmā amnhī nhīpēx to ho ri papa. Nē axpēn tomnuj nē. Nē axpēn kām pagryk rāhā ho papa. Ā mē pahte amnhī nhīpēx anhŷr ho papa jakamā nhūm pre mē piitā kām mē pahkīn kêt nē. Pu mē pajaxwŷja pamā mē hkīn kêt nē.

*Tanhmā Tīrtūm kot mē pahto mex to hā harēnh  
Rōmān 5.6-8; Epes 2.4-10*

<sup>4</sup> Tā pu prem Tīrtūm kēp mē papytār xwŷnh ā harēnh ma. Kot tanhmā mē panē amnhī nhīpēx to hā harēnh ma nē mex o mex nē mē pakamā ukaprī hā harēnh ma. <sup>5-6</sup> Hāmri nē amnhī kaxyw hkōt pajamaxpēr nē hkōt amnhī xunhwŷ nhūm amnhī tā mē pahpumu nē mē pahto hkra. Nom mē pahte tanhmā amnhī to mex to hā mē pahpumunh kôt mē pahto hkra hkêt nē. Mē pahte tanhmā amnhī to mex tore hā. Na pre mē pakamā ukaprī nē ā mē papytār anē. Tā tanhmā na pre mē papytār to wehe? Nà na pre Jejus Kris kukwak ri te kot mē pane mē pahte amnhī tomnuj piitā kuhōnh par pyràk o mē panhīpēx. Hāmri nē mē pahwŷr amnhī Karō rē nhūm mē pahwŷr agjē nē mē pamā mē pahte amnhī nhīpēx nyw gō. Ā na pre Tīrtūm Jejus Kris kot mē panē htik kukwak ri mē pahto mex rax anē hāmri nē mē pahwŷr amnhī Karō rēnh anē. <sup>7</sup> Tā mēmo kaxyw na pre ā mē pahto mex anē? Nà kām mē pajapē jakamā na pre ā mē panhīpēx anē. Mē pahte amnhī tomnuj xwŷnh tā kām mē pajapē htŷx nē kām tanhmā mē pahto hprām kêt nē. Nē mē pahwŷr Kra Jejus mē nhūm wrŷ nē mē pahte amnhī tomnuj pānhā mē panē ty. Jakamā mē pahte amnhī kaxyw hkōt pajamaxpēr nē hkōt amnhī xunhwŷr xwŷnhjaja Jejus kukwak

ri mē pahpē Tīrtūm kraa. Ā na pre Jejus mē pahto mex anē. Jakamā kot puj mē nhÿrmā Tīrtūm mē wa kuri pahtīr tūm nē pamex nē papa ho papa. Koja wa nhÿrmā ā mē pahto mex anē.

**8** Ām hāmri na pa amā ā ja jarēnh anē Xitre. Jakamā kwa kēr ka inhma nē inhmar tÿx nē. Nē ho amnhī kaxyw Tīrtūm kôt mē hamaxpēr xwÿnhjē jahkre mex o ri apa. Kē mē amar xà hkôt tām ri amnhī nhÿpêx o pa.

**9** Nē mē kot htÿx ri mēmoj tā axpēn mā àkjēr o mē pa xwÿnhjaja kēr ka mē hkôt apa hkêt nē. Nē mē hkukamā mē higêt kôt apa hkêt nē. Rÿ finat Mojes kot Tīrtūm nhÿ hā kapēr ā axpēn mā mē àkjēr xwÿnhjē hkôt apa hkêt nē. Na htem ā ri axpēn mā àkjēr anhÿr o pa nē tām amnhī nhÿpêx kêt nē.

**10** Nē koja mē akwÿjē hō amnhī krā hkôt tanhmā hkwÿjē mā kapēr to nhūm mē kuma nē hā axpēn mā akir nē axpēn pê pikjēr kaxyw. Ka ja hā omu nē ā kapēr anhÿrja nē kām akapēr kē axte hkêt nē. Hāmri nhūm ama nē ām ama nē arī ā mē kām kapēr anhÿr japēr ka axte nē kām akapēr. Tā ra ate nē kām akapēr o axkrut tā nhūm arī ā kapēr anhÿr o axkrunëpxi japēr ka ja hā omu hāmri nē mē amnhī nē hano kē axte mē apê Kris kwÿjē hkôt ri pa hkêt nē. **11** Ā mē kot amnhī nhÿpêx anhÿr o mē pa xwÿnhjaja na mē ra Jejus wÿr pry kaga nē htÿx ri tanhmā amnhī tomnuj to ho pa. Nē ā amnhī nhÿpêx anhÿr o pa jao kēp Kris kwÿ hkêt ā amnhī to amnhīrīt.

*Pawre kot kagà jatur xà kamā tanhmā Xitre mā kapēr to*

<sup>12</sup> Nē kot paj tokyx ma Nīkop wȳr mō. Kēr pa tokyx hwȳr pōj nē amgrà pē krī nhō xwȳnhjē hkôt ixpa. Jakamā kot paj tokyx ma awȳr Atēmti rȳ Xikitre mē. Kē mō nē awȳr pōj ka tokyx tanhmā amnhī to hpa nē man ixwȳr mō pu mē Nīkop kamā axpēn pumu.

<sup>13</sup> Nē ota mē akuri Apor mē axiwôkat Jēntija. Koja wa mēmo arīgro hā ma krī hō hwȳr nojarêt ka wa kām mē apkur xà hkwȳ gō kē wa ma ū kamā mōr kēt nē.

<sup>14</sup> Nē kēr ka Kris kwȳjē mā anē kē mē arī ūrkwȳ pix kām hkrī ho hkrī hkêt nē. Kē mē tanhmā axpēn to mex to ho axpēn kōt pa. Nhūm mēhō kēp amrakati kē mē tanhmā ho ajuta hto. Mē kām anē kē mē ū axpēn nhīpēx anhȳr o pa.

<sup>15</sup> Nē ota jar Kris kōt pahkwȳjē piitā awȳr hpēr mē Xitre. Nē kēr ka atar Kris kōt mē pahkrāmnhwȳjē mā mē ijarē.

E ūm ja pix. Kē Pahihti Jejus mē akutā nojarêt rāhā ho pa. Ixpē Pawre na pa amā ū ixkapēr nē hā kagà nē awȳr mēnh anē.

**Tīrtūm kapēr ã kagà nyw  
New Testament in Apinayé (BR:apn:Apinayé)**

copyright © 1999 Wycliffe Bible Translators, Inc.

Language: Apinayé

Translation by: Wycliffe Bible Translators, Inc.

Apinayé [apn], Brazil

**Copyright Information**

© 1999, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Apinayé

**© 1999, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

**2014-04-21**

---

PDF generated using Haiola and XeLaTeX on 11 Nov 2022 from source files  
dated 29 Jan 2022  
383a4e22-34cd-505f-9cc2-2f9921e7aa9f